



20. marts 2024

UPA2024/80

Inatsisartut Suleriaasianni § 36 naapertorlugu oqallisissiatut siunnersuut imaattoq matumuuna saqqummiuppara:

Inatsisartunut qinersinermi inatsit tunngaviatigut, inatsisartullu agguataarneranut kisitseriaaseq, inatsisartut amerlassussaat kiisalu qanoq nunatsinni siammasissumik inatsisartuni ilaasortaataqarneq, qanga kommuunit kattutinngikkallarmata kredsimi qinikkat 17-it ilaasortanngorsinnaanngortillugit aamma illoqarfiit inuttussusii najoqqutaralugit ilaasortaqalerlutik apeqquteqaat aallaavigalugu oqallisissiamik siunnersuut.

(Inatsisartuni ilaasortaq Jens Nap̃tôK', Naleraq)

Naleqqamiit isumaqarpugut inuit oqartussaaqataanerat ineriartortinneranut atatillugu qinersinermi inatsiserput ataavartumik nalilersortassagipput aamma naleqqussaanerit pisariaqartut pisassasut inuit oqartussaaqataanerat nukittorsarniarlugu.

Inatsisartuni ilaasortat suli 31-iussappat imaluunniit ilaasortat ikinnerussappat amerlanerullutilluunniit aamma pitsaaqutit ajoqutaasullu suussappat ilaasortat ikinnerulerpata amerlanerulerpataluunniit.

Qinersinermi inatsit maanna atuuttoq najoqqutaralugu inatsisartuni ilaasortat qinerneqartassappat imaluunniit inatsit naleqqussarneqassava inuttut amerlanerpaanik qinerneqartut ilaasortanngorlutik, taamaalilluta partiimut taasinerit ilaasortat amerlassusiinut aalajangiisuujunnaarsillugit qulakkiissavarput.

Qinersinermi inatsit allanngortinneqanngikkallarmat nuna tamakkerlugu kredsimi qinikkaneersuupput, Kalaallit Nunarput qinersivimmut qanga kommuuninut agguataassavarput, kredsimi qinikkat 17-it qulakkeerlugit.

Inatsisartutsinni ilaasortat amerlassusii naammaginartut qassiuppat, ikinnerussappat amerlanerussappalluunniit. Inuit oqartussaaqataanerat nunatsinni atuuttoq naleqqussarniarlugu nunanit allanit isumassarsiussaagut? Saamit 43-nik ilaasortaqarput, naak Norgemi 12.500-naagaluarlutik aamma siamasissorujussuarmik najugaqaraluarlutik, ilaasortat taama amerlatiginissaat kissaatigisimavaat, taamaalilluni amerlanerpaat peqataatinniarlugit.

Qinersinermi inatsimmi tunngaviit pingaarnerit oqallisiginissaannut qilanaarpugut aamma neriuutigaarput inuit oqartussaaqataanerat ineriartussasoq – Oqallilluarisi.